

AUGLÝSING

um staðfestingu á stjórnunar- og verndaráætlun friðlandsins á Hornströndum, Ísafjarðarbæ.

Samkvæmt 3. mgr. 81. gr. laga um náttúruvernd, nr. 60/2013, hefur umhverfis- og auðlinda-ráðherra staðfest stjórnunar- og verndaráætlun fyrir friðlandið á Hornströndum, Ísafjarðarbæ. Einnig hefur ráðherra staðfest eftirfarandi reglur um dvöl og umferð sem settar hafa verið fram í stjórnunar- og verndaráætluninni í samræmi við 2. mgr. 81. gr. laga nr. 60/2013:

1. gr.

Óheimilt er að dreifa framandi tegundum innan friðlandsins, sbr. kafla 3.3.2.

2. gr.

Kvikmyndataka og ljósmyndun skal ekki trufla dýralíf innan friðlandsins og truflun við aðra gesti skal vera í lágmarki. Kvikmyndataka og ljósmyndun sem getur haft áhrif á náttúru svæðisins og upplifun gesta er háð leyfi Umhverfisstofnunar. Stofnuninni er heimilt að setja skilyrði þegar slík leyfi eru veitt. Sótt skal um leyfi til kvikmyndatöku innan friðlandsins ekki seinna en 30. maí ár hvert, sbr. kafla 3.6.2.

3. gr.

Reiðhjól eru óheimil innan friðlandsins, sbr. kafla 3.9.3.

4. gr.

Umferð hunda er óheimil innan friðlandsins. Land- og húseigendum er heimilt að vera með hunda sína, þó ávallt í taumi. Björgunarhundar og leiðsögu- og þjónustuhundar eru undanskildir banninu, sbr. kafla 3.6.3.

5. gr.

Landverði eða umsjónarmanni svæðisins er heimilt að loka tímabundið viðkvæmum svæðum, vegna gróðurverndar, lífríkisverndar eða við erfiðar gönguaðstæður og beina gestum svæðisins um aðrar leiðir. Samráð skal haft um slíka ákvörðun við hlutaðeigandi sveitarfélag, landeiganda og fulltrúa ferðaþjónustu og útivistarfólk, sbr. kafla 3.8.

6. gr.

Landtaka skipa með 51 eða fleiri farþega (farþegar og áhöfn) innan friðlandsins og farar-tækja í tengslum við þau er óheimil nema að höfðu samráði við Umhverfisstofnun, sbr. kafla 3.13. Undanskilið banninu er eftirfarandi:

- a. Landtaka vegna rannsókna, þó háð leyfi Umhverfisstofnunar.
- b. Leitar- og björgunaraðgerðir og starfsemi Landhelgisgæslunnar, sbr. reglugerð nr. 60/1998 og reglugerð nr. 1185/2012.

7. gr.

Aðeins er heimilt að fara með hópa 30 manns eða færri á vestara svæði og skipulagðar hópferðir skulu ekki vera fjölmennari en 15 á austara svæði. Séu hópar stærri skal haft samráð við Umhverfisstofnun, sbr. kafla 3.8.1 og 3.8.2.

8. gr.

Á þeim tíma þegar gróður, lífríki og gönguslóðar eru viðkvæmir fyrir að vori og hausti þá þarf að tilkynna ferðir sínar rafrænt til Umhverfisstofnunar, eða frá tímabilinu 1. mars til 15. júní ár hvert og frá 1. september til 1. nóvember ár hvert vegna ferða um svæðið. Þessi tilkynn-ingarskylda tekur þó ekki til ferða hús- og landeigenda, sbr. kafla 3.8.

9. gr.

Óheimilt er að lenda þyrlum innan friðlandsins nema að fengnu leyfi Umhverfisstofnunar, sbr. kafla 3.12. Undanskilið banninu eru leitar- og björgunaraðgerðir og starfsemi Landhelgisgæslunnar, sbr. reglugerð nr. 60/1998 og reglugerð nr. 1185/2012.

10. gr.

Óheimilt er að lenda flugvélum innan friðlandsins utan landingarstaða sem skilgreindir eru samkvæmt aðalskipulagi Ísafjarðarbæjar 2008-2020, nema að fengnu leyfi Umhverfisstofnunar. Landeigendum er heimilt að lenda á sínu landi. Undanskilið banninu eru leitar- og björgunaraðgerðir og starfsemi Landhelgisgæslunnar, sbr. reglugerð nr. 60/1998 og reglugerð nr. 1185/2012, sbr. kafla 3.12.

11. gr.

Óheimilt er að starfrækja loftför, þar með talin flygildi (dróna), innan friðlandsins nema að fengnu leyfi Umhverfisstofnunar. Undanskilið banninu eru leitar- og björgunaraðgerðir og starfsemi Landhelgisgæslunnar, sbr. reglugerð nr. 60/1998 og reglugerð nr. 1185/2012. Leyfisskilyrði hafa skulu ávallt leita sér upplýsinga um gildandi reglur um starfrækslu ómannaðra loftfara og leita leyfis Samgöngustofu í samræmi við þær reglur, sbr. kafla 3.12.

12. gr.

Aðeins er heimilt að tjalda á skilgreindum tjaldsvæðum innan friðlandsins. Landeigendum er heimilt að leyfa tjöldun á sínu landi og sjá þá gestum sínum fyrir hreinlætisaðstöðu, sbr. kafla 3.6.

13. gr.

Vegna gróðurverndar er aðeins heimilt að hafa tjald innan tiltekins tjaldstaðar í eina viku í senn, þá þarf að færa tjaldið innan tjaldstaðarins eða taka það niður, sbr. kafla 3.6.

14. gr.

Öll umferð skipa nær sjófuglabbyggðum en 115 m er bönnuð. Umhverfisstofnun beinir þeim tilmælum til sjófarenda að fara ekki nær fuglabjörgum en 1 km, sbr. kafla 3.13. Undanskilið banninu eru:

- a. Umferð vegna nytja hefðbundinna hlunninda.
- b. Umferð skipa og báta sem leita vars vegna veðurs og sjólags.
- c. Umferð skipa og báta eftir hefðbundnum siglingaleiðum.
- d. Leitar- og björgunaraðgerðir og starfsemi Landhelgisgæslunnar, sbr. reglugerð nr. 60/1998 og reglugerð nr. 1185/2012.

15. gr.

Óheimilt er að þeyta flautur, fljúga flugvélum eða vera með annan hávaða að óþörfu í grennd við fuglabjörg. Enn fremur er óheimilt að hleypa af skoti á landi nær fuglabjörgum en 200 m og á sjó nær en 500 m. Aldrei má skjóta fugl í fuglabjörgum.

Stjórnunar- og verndaráætlunin öðlast þegar gildi.

Umhverfis- og auðlindaráðuneytinu, 30. janúar 2019.

Guðmundur Ingi Guðbrandsson.

Sigríður Auður Arnardóttir.